

Nanyi mfahamu kwamba mlikombolewa si kwa vitu viharibikavyo, kwa fedha au dhahabu; bali kwa damu ya thamani, kama ya mwana-kondoo asiye na ila, asiye na waa, yaani, ya Kristo—1 Petro 1:18, 19.

Neno la Mungu ni chombo kikuu ambacho kinawasadikisha wasioongolewa, likiwathibitishia hitaji lao la Mwokozi anayesamehe dhambi. Mpango wa wokovu unajumuisha mvuto mtakatifu wa zamani na nuru ya sasa. Mvuto hii inafungwa pamoja kwa mnyororo wa dhahabu wa utii wa upendo. Kumpokea Yesu kwa imani na kunyenyekea katika kuyatii mapenzi ya Mungu kunawafanya wanaume na wanawake kuwa wana na binti za Mungu. Kwa nguvu ambayo ni Yesu pekee awezaye kuitoa wanafanywa kuwa washiriki wa familia ya kifalme, warithi wa Mungu na warithi pamoja na Yesu....

Kumpenda Mungu kwa moyo wote, kuwa mshirika pamoja na Yesu katika aibu na mateso Yake, kuna maana zaidi kuliko wengi wanavyoelewa. Upatanisho wa Yesu ni ukweli mkuu ulio kitovu ambapo hushikamana kweli zote zinazohusu kazi kuu ya ukombozi. Akili ya mwanadamu inapaswa kupatana na akili ya Kristo. Muungano huu huutakasa uelewa, ukiifanya imani kuwa dhahiri na yenye nguvu....

Ulimwengu ni eneo la kazi yetu ya utume, na tunalazimka kuendelea na kazi yetu huku tukizungukwa na mandhari ya Getsemani na Kalvari....

Mungu anachukia zaidi kutojijuhisha katika mambo ya kidini hata zaidi ya Anavyochukia kukosa uaminifu, kwa sababu kujidai kuwa mtu wa dini bila kuwa na dini ya kweli ni kikwazo kinachowazuia wenye dhambi daima. Kadiri wanadamu wanavyozidi kuwa baridi na wa desturi katika maisha ya kidini, ndivyo wanavyozidi kujawa na ubinafsi, na ubinafsi siku zote hufanya kazi kinyume na Yesu. Unaweza ukawa na maarifa mengi, lakini usipokuwa na dini ya kweli na iliyo safi, maarifa yako ni bure kwa Kristo....

Mungu aepushie mbali kwamba msinenewe maneno haya, “Nayajua matendo yako, ya kuwa hu baridi wala hu moto; ingekuwa heri kama ungekuwa baridi au moto. Basi, kwa sababu una uvuguvugu, wala hu baridi wala moto, nitakutapika utoke katika kinywa changu. Kwa kuwa wasema, Mimi ni tajiri, nimejitajirisha, wala sina haja ya kitu; nawe hujui ya kuwa wewe u mnyonge, na mwenye mashaka, na maskini, na kipofu, na uchi. Nakupa shauri, ununue kwangu dhahabu iliyosafishwa kwa moto, upate kuwa tajiri, na mavazi meupe upate kuvaa, aibu ya uchi wako isionekane, na dawa ya macho ya kujipaka macho yako, upate kuona. Wote niwapendao mimi nawakemea, na kuwarudi; basi uwe na bidii, ukatubu” (Ufunuo 3:15–19).

Kila nafsi inaweza kutajirika katika hazina za kiroho. Katikati ya dhambi za kutisha za ulimwengu huu watu wanaweza kumtumikia Mungu kwa uaminifu kiasi kwamba Anaweza kuwajaza kwa utajiri wa milele. Atafanya kazi kwa ajili ya wale wanaomtumikia kwa uaminifu. Anaweza kuwanyenyekeza watesaji wakatili zaidi wa watu Wake, akiwafanya kuwa marafiki kwa njia ya kuuamini ukweli, au akiwaondolea uwezo wao wa kudhuru (Letter 122, 1901).